

www.BibleForChildren.org

Mateo 1



Impogini onakotanakera Isavere 6 kashiri itimakera
otyomiani yogari Tasorintsi ariokya itigankakeri
Gavirieri iriatakera Nasareku Garireaku. Ariotari
otimiri kara paniro tsinane paitacharira Maria. Onti
okyakona antarotankitsi tera ineimatero surari. Aiño
ogashigane ipaita Jose panikya iragakero. Irirori inti
iyashikitanakerira Koveenkari Iravi.



Irirori ikantiro: —Gara pitsarogi,
ishineventasanotakempitari
Tasorintsi. Maikari maika intimake
pityomiani. Impogini imechotakera
pimpaitakeri Jeso.
Pairo iravisake
inkametitasanotakera
iravisakeri maganiro.
Inkantakenkani Itomi Tasorintsi
timatsirira enoku. Yogari Atinkami
Tasorintsi imegakagakeri
koveenkari inkañotagakemparira

Iravi pairani. Inkantakani
imegakempa Igoveenkari egite
iseraereegi, gara itimumati pugaerinerira.



Impogini irirori okanti: —ćTyarika
nagakeri notyomiani? Tekyatanika
intimenika nojime. Ikanti irirori:
—Iripokaketari Isure Tasorintsi
viroku. Yogari Tasorintsi
timatsirira enoku
iragaveakagakempi,
nerotyoga yoga pitomi
mechotankitsinerira
inkantakenkani
yashintarira
Tasorintsi, aikiro

inkantakenkani
Itomi.



Impogini ovetsikanaka Maria oatakera
Joreaku. Impo oatake otonkoanaka
otishiku otsatimavagetanake tsikyari
oneero Isavere.

Ogonketapaaka otimira
oneapaakero pirinitake
ovankoku

okantapaakero:

—¿Oga aiñovi?

Okemutarotyó

Isavere ogatyó

ikenake yoanaka

otyomiani omotiaku,

itinkamimatankarotari
Isure Tasorintsi.



Oniamatanaketyo omaraenkarika okanti:
—iVinti ikavintsaasanotake Tasorintsi!
Maganiro tsinaneegi ikavintsaakero,
kantankicha virori
pairotyo yavisake
itasanotakempira.
Ario ikañotaka
pityomiani irirori
païro
ikavintsaasanotakeri.



Maika nonkenkitsatakotakeri Jesokirishito tyara
ikantaka ikyasanokyara
ipokutira aka kipatsiku
imechotakera. Pairani
otimake tsinane opaitaka
Maria. Inti kashigakaro
surari ipaita Jose.
Impo tekyara
iragero itimake
otyomiani, intitari
timakagakeri Isure
Tasorintsi.



Yogari Jose ikogavetaka
irapakuanaeromera gara
yagiros, intitari
negintevagetacharira,
kantankicha
itsarogakagakaro
nerotyos tera inkoge
intsavetantakerora
irogipashiventakerora,
onti isurevetanaka
irapakuanaeromera
maireni gara ikanti
tatoita yapakuavitanairo.



Kantankicha iroro isurevetanakara inkañotakeromera maika ikoneatimotakeri isaankariite Tasorintsi igisanireku ikantiri: "Jose, virori vinti iyashikitanakerira Iravi. Maika onti nopokashitake nonkantakempira kametitake pagakerora Maria pamanakerora pivankoku."



"Yogari otomi intitari timakagakeri Isure Tasorintsi,
irorotari itimantakarira. Impogini omechotakerira
pimpaitakeri Jeso, irirotari
gavisaakoigakerine itovaireegi
ganiri ikisaviigiri Tasorintsi
ikañovageigara."



Impo ikireanaira Jose ikematsatakeri isaankariite
Tasorintsi ovasi iatake yagakitiro Maria
yamanakerora ivankoku, kantankicha
tera ineimatero kigonkero
omechotakerira otomi.
Antari imechotakera yogari
Jose ipaitakeri Jeso.



Antari ityomiakyanira Joan ikantake koveenkari Sesa
Aogoseto intsirinkakoigakempara maganiro
matsigenkaegi. Impogini
iaigake maganiro
tyarikara
itimaigavetara



yashikitakeririra pairani intsirinkakoigakempara.



Yogari Jose onti itimake Nasareku Garireaku. Impo
irirori iatake intsirinkakotempara Verenku Joreaku,
ariotari imechotakeri
Iravi yashikitanakeririra.
Itentanakaro
itsinanetsite




Maria ariomonkitake.



Impogini iatake
yogonkevetapaaka
pankotsiku
omagantapinitaganirira
ineaigapaakeri
matsigenkaegi ...



... shatekaitavagetaka
tyampatyo
irimagaigapaake kara,
neroty oonti
imagantaigapaaka
pankotsi
imagantaigarira
piratsi.



Impo aganakara omechotantakemparira Maria
omechotake, inti otomi. Oponatakeri kamisaku
oginoriantakari isekatantarira
piratsi.



Antari anta ochoenitakara Veren otimakera
shimpenashi, ario inaigake kara sentaigiririra ovisha
ikireaventaigakerira irovishate.



Impo katsiketyo yontenenkakoigakeri Tasorintsi
ineaigutarityo aratinkake isaankariite Tasorintsi,
itsarogavageiganaketyo kara.



Kantankicha irirori ikantaigiri: "Gara pitsarogaigi.
Onti nopokashitake nonkamantaigakempira
pishinevageigakempaniri viroegi
intiegiri aikiro maganiro
pitovaireegi."



"Antari anta Verenku itimavetara Iravi pairani
mechotake gavisakoigakempinerira, irirotari
Kirishito itigankakerira Tasorintsi
impegakempara
Pigoveenkariegite."



"Maika piaigake pineaigapaakeri ponataka kamisaku
noriaka isekatantarira piratsi. Iroro
pogotantaigakempa tera
namatavinaigempi."



Irorompatyo yagatanakera iniavagetakera
ineaigutarityo aratintiitaigake iriroku
pashini isaankariite Tasorintsi
intovaigavagetetyo kara



iponiaigaka
enoku.



Iriroegi iniaiganake ikantaigi: "iPairo ikametiti
Tasorintsi timatsirira enokul! iAkari aka
kipatsiku irishinevageigakempa
maganiro inkavintsajaigakerira!"



Impogini iaiganaira iriroegi enoku
iniavakagaigaka sentaigiririra ovisha
ikantaigi: — Tsamenityo aigakera
Verenku ankamosoiguterira
ikamantaigakairira.



Iaigake itsatimavageiganake yogonkeigapaaka
ineaigapaakeri Jose ontiri Maria intiri aikiro otomi
noriaka, inoriantakaro isekatantarira piratsi. Iroro
ineaigapaakerira ikamantakoiganakero magatiro
kantaigakeririra isaankariite
Tasorintsi.



Antari imechotakera Jeso
Verenku Joreaku aiñ o
igoveenkariiegite Joreakunirira
paitacharira Erorishi. Impogini
ipokaigake Jerosarenku pashini
govageigatsirira iponiaigaka

oatakara ikontetira poreatsiri.
Iriroegi inti ipiriniventaigi
impokiropage
irogotantaigakemparira
posante.



Antari yonkeigapaakara
ikantaigapaakeri timaigatsirira
kara: —¿Tyara inake
kara igoveenkariegite jorioegi
ikyaenkarira mehotankitsi?,
noneaigakeritari impokiro

ikontetapaakera yogaenokanakara
nogotantaigakarira mehotake,
nopokantaigakarira
nonkamosoiguterira
nontigeroaventaigakitemparira.



Impogini Erorishi maireni
ikaemakagantaigakeri
govageigatsirira teratyo
tyani inkamante. Iroro
yogonkeigapaakara
ikantaigavakeri: —ć Tyati
pineantaigakari
ikontetapaakera impokiro?
Impogini ikemakera
ikamantaigakerira
itigankaigakeri . . .



... Verenku ikantaigavakeri:
—Atsi piaige
pinkogasanoigakiterira,
impo pineaigakeririka
pimpigaigae
pinkamantaigakenara
kameti noatakiteniri
naro aikiro
nontigeroaventakitemparira.




Iroro ikemaigakera ikantaigakerira iaiganake
Verenku. Yogari impokiro ineaigakerira okyara anta
itimaigira iivaiganakeri impo
yaganakerora okatinkatakera
pankotsi inantakarira Jeso
ario ikusoenkatapaake kara.



Impo yogonkeigapaakara pankotsiku ikiaiganake
tsompogi ineaigapaakeri Jeso ontiri iriniro ovashi
itigeroaventaigapaakari. Impo
itsaakoigakero
yamaigakeneririra ipaigakeri
kori, kasankapaneri ontiri
mira.



Impogini imagaigakera ikamantaigunkani igisanireku
ganiri ipigaiganaa Erorishiku, nerotyō
ikenapitsatantaiganaaririra
parikoti iaigaira itimaigira.



Impogini iaigaira iriroegi
yogari isaankariite Tasorintsi
ikoneatimotairi Jose
igisanireku ikantiri:
"Tinaanake ganakero
pitsinanetsite intiri
otomi plate shiganake
anta parikoti Ejipitoku,
inkogakagantakeritari
Erorishi



irogakagantakerira.:"



"Pinkantakani pintimakera kara
kigonkero nonkamantaempira
kametitake pimpigaera."
Iroroty ikemakera
ikantakerira ogatyo ikenake
itinaanaka yaganakero
itsinanetsite intiri
otomi
ishiganinkaiganaka

tsitenigetiku iaigakera
Ejipitoku.




Itimuntevageigake anta
asatyo ikamanaira Erorishi.
Ario ikañoigaka maika kameti
ontsatagakenkaniniri
ikantakerira Tasorintsi
pairani
itsirinkakagakerira
kamantantatsirira
ikanti: "Itimavetaka
Notomi



Ejipitoku, impogini
nokaemairi."





Impogini yogari Erorishi
ineakera tera impigaigae
govageigatsirira
ikisamatanakatyo ovashi
itigankaigakeri soraroegi
irogaigakiterira maganiro
anankiegi timaigatsirira



Verenku
intiegiri aikiro ...




... timageigatsirira
ochoenigetira
impogereaigakerira maganiro
ikyarira mechoigankitsi
kigonkero inkaratagaigakeri
shiriagakoigankicharira piteti.
Irorotari ipampiatake



ikantaigakeririra
govageigatsirira.





Impogini ikamanakera
Erorishi yogari isaankariite
Tasorintsi ikoneatimotairi
Jose igisanireku ikantiri:
"Maikari maika tinaanake
ganaero pitsinanetsite
intiri otomi piataera
anta Iseraereku,
kamaigaketari

kogaigavetankicharira
irogaigakerimera."




Kantankicha antari ikemakotakerira Arekerao itomi
Erorishi ipugairira
iriri ipegakara
koveenkari Joreaku
ogatyo ikenake



itsaroganake ovashi
tera inkoge iriataera anta.
Impogini ikamantunkani igisanireku
ganiri iatai Joreaku, neroty
iatantakarira Garireaku.



Yogonketapaakara anta itimapaake Nasareku.
Ario okañotaka maika
otsataganakara
ikantaigakerira



kamantantaigatsirira
iniakoigakerira Jeso ikantaigakera
onti inkantakenkani, "Inti Nasarekunirira."



Yogari Tasorintsi
pairotari yavisake
itasanovageigakarira maganiro
matsigenkaegi, nerotyó
itigankantakaririra Itomi panirorira
inkamaventaigakerira kameti ganiri
ineaigairo igamane maganiro
kematsaigakerinerira
onti inkantakani
intimaigake.



Iromakunirira 3:23 Ikañovageigakatari maganiro, tera tyani tsatagumaterone magatiro ikogagetirira Tasorintsi kameti irishineigakempariniri.

Iromakunirira 6:23 Maganirotari kañovageigacharira inkamaiganakerika iriaigake morekariku, kantankicha yogaegiri kematsaigiririra Atinkami Jesokirishito inkavintsaavageigakeri Tasorintsi iriaigakera enoku inkantakanira intimaigake, garatyo ineimaigairo igamane.

Evereoegi 9:27 Maganirosanoty matsigenkaegi inkamumatakera patiro gara ikamai aikiro. Impo inkantake Tasorintsi tyani atankitsine enoku, aikiro tyani atankitsine morekariku.



Epesokunirira 2:8,9 Nonkantutaigaempityo aikiro ikavintsajaigakempi Tasorintsi yogavisaakoigakempira pikematsaigakerira Kirishito, pineaigaketari arisano ikamaventaigakempi. Teranika tsikyata pogavisaakotagantaigempa viroegi, tsikyatatyo ikogake irirori irogavisaakoigakempira. Garorokari paventakotumaiga, teranika iroro irogavisaakoviigempi Tasorintsi povetsikaigakera viroegi.

Iromakunirira 10:9,10 Pinkantakerika: "Yogari Jeso inti Notinkami", aikiro pogotasanotakera pinkantakera: "Arisanoniroro yoganiari Tasorintsi ikamavetakara", ario pinkante irogavisaakotakempi Tasorintsi. Arisanoniroro ineaigiri Tasorintsi kañomataka tenirikatyo inkañovagetumaigempa yogaegi kematsatasanoigiririra Jesokirishito. Aikiro yogavisaakoigakeri maganero kantaigatsirira: "Jesokirishito inti Notinkami."



Joan 3:16,17 Yogari Tasorintsi pairotari yavisake itasanovageigakarira maganiro matsigenkaegi, nerotyó itigankantakaririra Itomi panirorira inkamaventaigakerira kameti ganiri ineaigairo igamane maganiro kematsaigakerinerira onti inkantakani intimaigake. Teranika iroro intigankaviteri aka kipatsiku inkisakagantaigakerira matsigenkaegi, ontityo itigankavitakeri irogavisaakoigakerira.

1 Joan 5:11-13 ¿Tyara ikanti ikamantakotakerira? Onti ikantake itigankakerira iroganiaigakerira maganiro kematsaigakerinerira inkantakaniniri intimaigake. Yogari kematsatiririra Itomi Tasorintsi inkantakani intimake, kantankicha yogari terira inkematsateri kañomataka ontinirikatyó ikamake. Notsirinkaigakempi maganiro viroegi kematsaigiririra Itomi Tasorintsi kameti pogotasanoigakeniri mataka yoganiaigakempi kameti pinkantakaniniri pintimaigake.



Mateo 1-2; Irokashi 1-2

Storyline by: Edward D. Hughes

Illustrated by: M. Maillot
and Alastair Paterson

Adapted by: E. Frischbutter, Sarah S.

Machiguenga NT (mcb) © 2008, Wycliffe Bible
Translators, Inc. All rights reserved.

<https://live.bible.is/bible/MCBTBL/MAT/1>

©2024 Bible for Children, Inc.

www.M1914.org

www.bibleforchildren.org

